

槐野先生存笱稿

槐野先生存笥稿卷之二十八

左輔王維楨著 館甥渭上南師仲編

小簡四十首

與孫季泉宗伯簡

在家僅八月僻居散髮真成疎慵見客到著衣冠如  
猿猴在籠唯思二三知己沓沓天涯以故時與雲霄  
之念若曰薦歷累勞冀希崇峻始願不有今觀覽世  
故益落莫矣

二序至諸公云何旋生口語此理執必有著此中首  
末惟吾兄知之信之他人謂我欲呈技也成毀者功

名之士所常有也惟慮好事者之口指松栢爲藤蘿  
令名敗身辱弃其素立此君子所以畏世防人也近  
部檄督往老親又促之行且母子相依者也老親獨  
子弃而遠離豈其甘忍老親苦旅居寂寥堅不欲出  
弟又無攜家宦游之理而隻躬在外又貽親念此進  
止之難交戰而未決也雨窓獨坐意緒正煩引紙申  
致如此

翰至獎予鄙作溢有愧莫以勝在家雖稱閒曠然每  
廢吟詠何者靡唱誰和無耳焉聽其理然也乃若探  
究往牒頗窺真詮欲把公臂一極論共訂之然術乏

長房不能縮地求晤祗益悵憶耳兩奉雄撰咸精銳  
有體符契古昔眎它逐時好騁浮華者卽萬里弗超  
也僻處寂寥每念雲霄舊侶渺渺神疲其不卽北者  
唯老親孤兒實難遽離乃邇延節月耳竊又念謀之  
二歲始得歸歸猶未暮輒復治行徒擾擾道路于初  
志何如也

求書單棲歸念與火雲俱昇然獨憶高賢阻絕有懷  
未展因采掇杜句綴而成章以見志焉猶恐渙渙也  
昨枉車轍會我南出不與遘且念公在養何又遠涉  
觸彼炎煙也走使申意併勸御者勿復理行

惠至絹色及品俱嘉之甚以弟昨與公晤語次及易  
絹欲馳奉老母不得嘉者如我願公因念之遂用貽  
逮若此然非其意也卽且械附僮使歸獻之母書明  
言此醬色絹者同館兄孫宮允所予兒以色求之他  
所不得孫聽言歸以言之內內出絹如所求色孫封  
具予兒云致之母此其本末也孫宮允者卽曩寓京  
時晨夕相持及母之西也與其兄總兵君偕來拜母  
于堂頽而長者總兵而宮允則彼面如紫王狀謙謙  
若不勝衣者也書如此言庶老母憶思得之記其容  
益信其德也推愛逮所親友道如此邇所鮮睹感激

萬之恒情矣

前數日東野來視弟疾因知玉體在養凡人形勞則  
憊心勞則熱此大都也今公之憊弟之熱正坐二道  
自下捷謝客問醫服餌百應都絕理之十日許漸復  
然無柰客固求見何問又熱獨旅閭寂鄉心偏生懊  
不羽翰卽往始疾之來也緣自良鄉送老親歸悲苦  
在臆邑邑不得申則日夜望以故耗損元神猶之拖  
新增炊釜安不沸水安不竭也今面赭溼四體癢搔  
皆火使然慮夏令至更益助熱爲病子累爾今早始  
開關見客計且遣使走候乃使來傳溫諭誼存休戚

在言和 卷三十一  
非浮相朝夕者頓覺疾去數分昔人暗檄而愈頭風  
者殊非虛哉再遷一室頗邃端設一榻俟高人下則  
寔慰我心耳

贈言之例在昔回路已然頓竟不得諸公一字是弃  
之矣幸賴名撰在卷稍慰慙衷亦可以見知己之難  
也往日寄作勞公委曲令完補無缺真愛如此頓辱  
教有歲昔訂言撰古詩十章爲贈初非謾語謂誼重  
則單詞難述歌長則深衷庶褻也乃浹年杳月存而  
不作誠敢忘之哉頃以吟思落莫冀有金奏乃後用  
石和之不謂索逋也繼自今奉責命卽宜緒理積恩

衍而成章不欲令夙盟冷也天雨驅暑爽氣宜人昨  
熱時視宇宙皆洪爐矣霽後能鞍馬出門不

始以爲公所不快者或偶觸乍得旋復有瘳昨與伯  
兒語則知今不快猶坐前疾據不受驅且前疾甚輕  
眇今久不去何也乃公初教務在精明又欲削冗振  
墜皆以勞費心神夫勞生火火生欲欲發如弩弗可  
制勞人不能勝欲病遂乘弱來苦之此方書所載鄙  
人不敢爲臆說通諷諭也言中與不安知之固特以  
公平日少欲肢體甚康平無病今一病累數旬愆素  
而反常以故竊意之如此今要在省事暫閒塊處一



室不與貴近者相朝夕一藥病減再則去三則還我本初不十日以之臨事肩勞卽不憊強甚幸無謂弟爲蒙瞽也鄙人同病而鄙人隻處少內令醫人早收功猶然憚遠勞北望止十里不能往訊也夜寐繫念在斯早起臨紙述之遣吏代白

惠至吳刻誠甚佳猶不敵孫解元卷得吳刻喜十三得解元卷喜十九也旣又諭我肯不顧俗忌力踐正途則喜益不勝凡弟所告語者率依憑名法主在風世軌物務鉅畧細不欲以區區之便傷大節也乃公不臯狂瞽竟從始願可以稱大勇矣仰嘆仰嘆聖人

之道有從俗亦有遺俗從俗謂無害苟有害卽遺俗  
弗顧矣今有兩人行而一人矇直蹈于淵彼不矇者  
弗蹈之矣不可謂不矇者不與矇者共一心也士各  
有志必其同則苦矣吾知我焉知他乎鄙人雅懷是  
念因以發之于道有濟不功名久促崇下吾能遺之  
于身則不忍弃也晚暮道途未悉非面不快

連日料理傳事而頭緒繁沓多于春林之筍迺始甚  
苦之思欲盡蒐諸事選類立部考辭就班已乃濡翰  
結局比事陳篇則庶乎不挂漏不繁穢也故大將行  
師必先定部署部署既整乃鼓而戰卽不勝猶稱有

制之兵莽莽從事第以應卒難以成驍也夫文亦若是而已私計晦日漸及有食言之懼顧復念急絃無善調疾走無善步急之則口吃寬之則詞竟其理然也方擬捐冗謝客專力營構且文亦有神神其助我乎不也

昨往滿擬得瞻冠履乃顧與左嗣圖更造也卽不會其尊人然幸接鳳毛爲歡轉益甚其留賦草草至勞惠答語雖近謹然篇章佳麗矣東野郭氏善興事端新春舊年之句本自郭氏發之公柰何不察而輒任兩耳也連朝甚苦煩勞不能申白所謂懶惰無心作

解嘲也

在昔吳楚相貽則出縞紵謂土產也古賢豪投分或  
解劍脫驂贈之豈以物相結納哉表裏徵信所以將  
愛輸義也僕辱君家昆季之知其休戚體戀逾于骨  
肉卽古人何讓焉所以贈遺門下者本之烟幅與居  
常酬答者弗類又其物皆秦華所作非市得外求也  
方遣往時度可以與可以取乃此械馳今公念貧多  
費靡使璧歸體察區區之意豈不感哉然君子處辭  
受間亦必視貨義孰重輕較所重者取之今翰云云  
似猶計貨掩義輕重不得當與庸衆往來者均視之

矣公于事皆宜獨此稍未宜耳原具再去幸亮入母  
煩僕夫

公爲弟計者詳審周至比之骨肉讀諭感頌惻愴以  
爲友道喪久矣面謾背憎吹沙射影益往往然矣若  
公所云近復有是心哉弟不安于獨旅惟繫戀老親  
以爲背母守官非子也令母有子而懷獨處之悲非  
人也業已遣使齎書顛述北來勉志就祿申以母子  
相依之說言甚委備其聽與不皆非弟所敢強也弟  
以老親甘意守家嘗言我在家歡樂在京苦不懽樂  
乃必強之來以重逆親志非知者也俟回音至則弟

念決矣是時方推推寧能有定乎弟又以人生意一  
去卽當直目視前路若回首顧卽不能去古云勇退  
有以也奉愛深重言不申感聊此復之耳明日當顯  
造

頃造公談及者數種切言之煩言之咸勇脫俗忌不  
與庸衆同流禮亞推逮寔公宜有除目下士論嘖嘖  
稱快充靡所生何云招也忌本無從何云速也功名  
之際群皆趨之苟不自我要傲來者則屬之公評矣  
何關肺腑至兢兢也嗣承翰諭始知昨報答不對本  
旨然語次所及者雖誤弗誤有深思焉昔人誤書舉

燭以遺燕相燕相疑其意以爲燭者明也諷我以明揚側陋也乃一旦薦賢而燕邦以治誤亦有禪勿謂誤者魯畧疎莽弗之察也復起三渠公于野君德相業並見廣遠仰歎無已用人俱若是奔競安由生哉早起怯寒草草附答詞涉直戇恃惠子知我耳連日夜正苦稱架尚未就篇蓋緒烈紛委裁益未之定也卽在數日內斷手耳凡撰大文譬如治大屋位置堂戶旣已有規則雕刻丹青無難也今不出見客二日矣爲一文不可成視倚馬者何遠也愧之天益不雨造化杳默未測其故乃翁引爲已臯斯則

刻責之甚者初受教爲傳盟計已三會矣頃盟在初  
旬實本志也乃夢坡決曰南還索文歸以壽太夫人  
行者不相待義須移力先此非謂渝盟然坐此格閣  
不得執筆亦不得謂畢命也今更自爲盟期以月內  
斷手更復渝之筆神當責我也頃自秦晉來者並道  
民有艱窘流冗載路乃燕趙今又大旱若此宜不能  
不勞 聖懷也諸省仰體一德涓戒協誠莫有二者  
天顧不之監蒼蒼不可問獨嘿嘿自循省耳禁解當  
相見面布

傳載伏節事獨詳謂太公謚忠烈平生事業至此乃



定故爾又敘陽明平難者以太公能練兵備患故王公得因之就功名耳首述濠謀逆不厭具列以爲見本末則稱傳信畧而襍之漫詞焉不可昭遠而信後也至其語意或中公見或稍有牴牾不妨往復評駁孝子爲親之心未有窮也今遣書吏齎投門下幸加審思僕文多直書不善掩覆委折卽其詞格法度遠謝古人然事核言直則近之矣

賜教佳篇渾如初唱而四句五句費破心力始成迺知良工獨苦也鑪香自非朝寺宮觀未見輕用或有之弟未睹也初起自然的如見據通篇較之則稱

雄逸而未結顧雅淡稍覺未稱陋見如此大方以謂如何

和篇春容閑雅先鞭襄陽非諛非諛起聯頸聯字字稱量不可加損朱墨并施猶未盡賞具眼者自有公評但領聯更請推敲比于前後二聯則光照連城色奪合浦矣何字此和不可再得不知何將軍何如和何也發笑不盡歎詠歎詠

昨于卧中吟思和篇始知妄肆評品早擬具解迺奉此教鑪鼎通用固矣然謂氣騰蒼霧非金鼎穹窿軒墀虛敞無此盛氣須易之第五句仍舊爲當又大道

弟亦誤評摩詰詩有大道今無外古詩有大道與君  
同二字環括衆義氣象洪偉弗可易也結句礙七句  
意更思之乃稱完璧蓋昨因雪獅子據吾腹中方擬  
制縛遂坐此失以此知古人之作間有被屈率是道  
也慎哉慎哉

凝字如尊諭用亦無害弟終持依違竢再思奉陳連  
讀全篇則第七句當承第六句生意結句卽承第七  
句爲是蓋道繫百年一二同志當何如策勵哉氣如  
奔湍直下未可停住他意縱佳恐非正脉詳之詳之  
弟技寡降龍尚能縛獅徐結網羅嚴設兵戟乃始可

制草草不克也

寅出西歸夜來稍萌佳思却爲今日塵土埋沒悵悵  
入舍方擬執筆忽值家中人至來日或能脫稿呈覽  
大作冲雅安慎無一可指但一結稍欠曲終奏雅之  
意兄于獅蓋已制伏全體獨尾尚搖未伏更加猛力  
令首尾盡馴可也呵呵

獅却難詠初擬取喻乃又思落于模倣雕鏤氣格不  
振肆意漫成恐非詠物體裁空攬腸胃句字不就頃  
奉來諭允獲鄙思唯唯郎詩領惠外稿求刪定風日  
望安卧帷中慮犯尊目也

弟尋詩之難無如此詠迺知西域名毛不認鄉里制  
縛其崛竒如此發笑發笑大作骸骨無議獨貯太和  
并玉麟文豹更加點定則成妙製結雅而淡戲不涉  
浪可以占兄養矣

蘓子此行爲親蓋仕宦希事也大作只以侍親命意  
而蘓子宦蹟文業隨所出入蓋識大體者漢人文也  
詞氣蒼鬱盡剷浮言而復不餽釘不詰曲尤所難者  
讀至終篇更不用冀其來朝之意尤脫俗見敬仰  
敬仰

錄稿二紙舊盟新約皆畢亦久稽矣詞章之道本濶

畧不可冒繫乃弟林守古法誠一方之士哉每誦諸  
公大撰亦思改轍又懼效趨失步柰何教之教之  
贈蔡章復更兩言于理當不也凡思深多獲莽莽然  
卽垂刺支離遠矣歲逼繁俗誠若坐溷中非勇拔力  
脫置身空虛之府沃以甘泉灑以清風則佳思不來  
願相與共努力人事一有缺失尚猶得補片言出不  
可追也

對山翁武功志往見公羨之以爲不及睹今得之故  
以入公對山諸撰是仙人辟穀食氣自爾冲天自難  
輕議公具大法眼一披卽知何俟瓊言

靜養卽學何必操管伸紙行墨也汎應誠苦自後力  
脫之庶一道也獵師出野本以射兕牧兒見山麋邀  
而請獲旣畧斷力分兕竟逸去不得則獵師拊心怨  
矣如何如何

蕓門集顛還讀竟篇率吐真素鉛華都謝不爭勝于  
一句一字間此其有妙悟者矣恨今不得自有其集  
俟有佐史求錄一帙昨枉車轍謝之

二作異體本難定擬非敢浮論以負知己益公近製  
俱各入格不甚相懸猶之射工發矢騎步雖殊而貫  
侯一也今必欲登卷則古選舒遲含痛有意有象而

律體亦未爲不得意者謙虛過矣

聞公下關謝客稱號補瀉其自重如此第靜養中當必構思大撰譬之定水安鏡萬象自照擾擾塵凡與物相驅逐誠未有得也石翁名卿用舍關氣運繫人心得公言揚摧之益灼灼矣俟成欲走讀之

早檢篋中舊作禠文皆不存意以此事猶不序及故留置家藏耳其抄韓非子僮輩不省是主人選集作爲廢書隔塵用矣惜哉惜哉弟早取非子全集一覽詞則古矣顧皆陰謀伏計傾賢妬善之爲言論雖依柔良而內離外合朋比作奸往往而見卒死于秦有



以也如何如何

潛夫論四冊顛復令嗣輩尚猶繫念功名但可治舉業射科而已此等迂務也非謝却塵俗希志古昔不以外慕清其中安可爲之教兒曹固有急緩之次若性所不有勉令改轍枉才之道也恃愛瑣言

文心雕龍二冊抄畢專復是書評校極精探作者之窟遊執君子不睹斯道徒以資之所近爲詞終蹈襄野之迷茲讀覽再四愛之又愛之也

連日夜旣苦俗擁又被招要甚困幾擬撰一詩未獲意在數日草就詩神肯至否也晁氏行迫又來督促

夫思猶泉也沙石旣渾乃挹而注之矍矍不可飲也  
須澄汰之今柰何惠詩一帙領已風氣漸凜亦欲卻  
掃避寒公今坐室而了公役甚得之西來趨侍未幾  
乘間卽往不必拘答謝也

首篇佳甚其盼或從初用望字爲得次和堯招二韻  
妥帖絕倫消字亦穩獨結句更須思索令與上意相  
串則兩作者卽有白璧一雙不與易也今昨熱愈甚  
才一臨几揮汗滿把附報草草

今詞曲二體俱用七言絕句爲當弟昨夕靜思深求  
故復此說亦知高見自殊猶獻瑣瑣牧童指襄野之

徑七聖所不厭也既已淨稿幸擲示傾注傾注

鼓吹體裁卽五言律不拘調者是已然亦有五言四句者又有五言十二句者又有長短句者紛紛不同總之應制之詞當從五言八句者爲是稿成定呈覽正亦望尊篇見示惠書領已

本緣取涼郊寺至則脫巾宴坐風林與釋子談竟日以爲是足稱極樂國矣奚又索吟哉自廢寢來近兩月餘冷如灰燼幸公嘯之使動當復還昨今寂寞甚矣

槐野先生存笥稿卷之二十八

槐野先生存笥稿卷之二十九

左輔王維楨著 館甥渭上南師仲編

五言古詩三十五首

贈汪氏赴瑯琊四首

以下北署稿

慶源堂爲許氏作

世芳樓爲許相公作

送人之南陽二首

贈汪子

贈謝子令大興

寄謝氏四首

與汪仲子別三首

贈余駕部之南都四首

贈瞿太史使梁 冊封四首

爲嚴相公題三瑞圖三首

貢院贈袁懋中學士二首

贈袁生督兵守鳳陽三首

以下留院稿

燕子磯次韻二首

五言古詩

贈汪氏赴瑯琊四首

初景照城闕垂楊蔭廣陌孤鳥遶樹鳴旦出送征客

感物愴離乖逐往思羽翮各天從此始喟然敘疇昔

其二

疇昔比廬舍跡邇情復深懽讌共晨夕譬彼連枝禽  
子也秦楚歌我乃嗣秦音人生悵雲雨誰能堪別襟

其三

別襟一何悽驅車一何速清晨發易水夕稅瑯山麓  
志士無卑業富國在慮淑君其最所司雲錦被林谷

其四

林谷鬱以紆有亭峙其巔昔者酩酊翁樂此著于篇  
前瞻滄海流仰捫青雲天巍哉佳勝區非子今誰宣

慶源堂爲許氏作

赫赫許氏宗光祚一何侈里門擁丹轂殿廷接朱履  
高陽謝多才韋相慙趾美美來諒有端云自哲祖始  
哲祖昔未達懷瑾栖窮里開堂羅詩書背軒執桑梓  
得宦不嗟卑冀以貽孫子嗣者旣雲興覽故情靡已  
息陰寧忘植對食必念耒三徑拓往規層構竦今址  
制改理無違代遙跡逾起豈伊輪奐競於焉祖是似  
粲粲新宮號玩之示訓理木本水有源來世其敬止  
世芳樓爲許相公作

皇代紹神聖賢哲應時作太公旣龍奮嗣公亦鳳躍

鳳躍在天池懷里眷昔閣前臨函谷關俯睇弘農郭  
長流縈綠澗遠巖耀蓮萼基崇望自延跡阻興焉託  
獨往憶前人宦成謝羈縛中園遂偃仰顧已歎今昨  
抑心遠故築年悠寂以冀苔蘚冒綺疏雲霧侵珠箔  
朝來誠奮蔚夕原信寥廓曩眺愜真趣今賞成虛諾  
振衣一何有 君王恩非薄

送人之南陽二首

鬱鬱雲中闕夾道耀朱樓駿馬飾飛纓美人佳遨遊  
頓轡趨明光攝容禮九旒出揚珊瑚鞭揖我向宛丘

其二



白水產真人卧龍起南岡運還風歛火事去星無光  
予心企遺躅子乃立故疆贈離無訊古援筆申此章

贈汪子

迢迢東南帆逝將起舊京洪川無滯楫况乃奉王  
程西顧望楚天白雲忽而生以茲感人腸游子安得  
寧改棹遵彭蠡沿涯采蘭英簡書豈不畏念此二  
人情如何絕裾子逐逐但榮名

贈謝子令大興

騏驥信千里發足在跬步卑卑栖棘羽縱之凌雲霧  
子也毛骨殊相要終天路茲焉逝行役願言慎所務

絃歌武城化彈琴單人附桐鄉炳遺烈河陽蔚花對  
平生蘊固竒古人良可慕隘子計微細達夫修遠度  
令名苟不虧折腰安足顧

寄謝氏四首

首夏與君別杪秋忽逮茲天道有變易世事安可期  
孤鴻暮南適噉噉噉何悲感物惻我衷各天悼乖離  
藹藹金閨遊夙昔相追隨嬾婉非怕情結義良在斯  
鷲颺吹飛藿倏爾東南馳安得肅肅羽奮飛從所思

其二

爲金寧免鑠抱玉崇其身賈生豈不美弃置湘江濱

仲舒遷膠西三策既之因賢豪恒屯蹇娥眉召妬嗔  
之子投臨海抑鬱志不伸古來多悲憤非爾獨沈淪  
蓄德固無匹揮翰亦絕倫令名既勿虧得失焉足陳

其三

佳人邈難卽言在赤霞岑高視天宇外長嘯揚哀音  
前臨滄海波云是桑麻林神理悟變化何浮不有沈  
幽懷自茲釋仙侶相追尋朝騎白鹿遊暮采瑤華吟  
倘遇雲中翰願以遺同心上言結未好下言保芳藪

其四

煌煌京洛內羅列十二衢車馬交橫馳纓冕皆鴻儒

日出照閭闔鳴佩紛來趨於心懷我友滄海滯其軀  
世故多局促旅遊寡歡娛閒居克憂患言念故里閭  
我當返初服避世甘愚鴛子當振羽翮重來翼 聖  
園人生各有因不見分飛鳧

與汪仲子別三首

翩翩雙鳳鳥比翼青雲端芳池不獨飲竹實必俱餐  
何意相背飛遽令乖所歡我有綠綺琴聊以誓自寬  
絲桐感人情拊之哀孤鸞推軫置之去逍遙步河干  
中有並游鳧戚戚念彌攢

其二

飄飄子行邁，譬如快鵠飛。豈不戀同袍，所念在庭闈。  
向期崇朝還，今已六年歸。升堂視白髮，權極轉歔歔。  
抽身勅中厨，辦膳腴以肥。餐我昔時箱，披我五紋衣。  
一舞慈顏開，再舞百憂違。樂莫斯日樂，遠遊今悟非。

其三

還子無苦顏，羈入寡歡趣。宛馬東道來，西風常反顧。  
予也寒鄙人，謬習從章句。會值好文時，凌風偶鸞翥。  
天路豈不廓，翱翔非所慕。華嶽雲臺遠，翳翳饒松對。  
其下盤茯苓，其上棲白鷺。歸與依吾鄉，延年而保素。

贈余駕部之南都四首

我后洽文德宇內富英彥迅才鬱雲興馳翰若飛電  
意氣凌風騷賸者咸驚羨我聞歐冶氏鑄之經百鍊  
至道蘊淵玄沙窮金乃見張衡才何逸十稔成二撰  
茲秣君能探余心誠繾綣

其二

吾愛南州子懷瑾嗜冲素纓冕填九衢茲爾厭馳騫  
擎舟遽南適高踪疇能附黃鵠異凡翮四海隨飛翥  
焉能同燕雀依依梁間度炎江晝歆蒸渚芳困毒霧  
願子慎行泊勿云匪躬故

其三

望吳行已卽迂棹忽而西問君何爲者嚴親重我懷  
趨里瞻喬木別久惑故蹊行行造堂階見面情復迷  
顧視筭中彩被服爛雲霓承歡安可極 簡書畏難  
稽含涕仍辭閤悲風爲酸嘶

其四

艤棹陟鍾岫眺竒俯吳疆故宮莽荆榛清淮流未央  
千年王氣還 皇祖重開荒碧城依庑踞飛閣擬龍  
翔十載心恒往葱鬱詎能忘冀君愜登賦枉我大夫  
章歷歷陳今昔慰茲念所當

贈瞿太史使梁 冊封四首

自爲京洛客，曲居城西隅。軒車避不來之子，恒相須。  
今朝就我辭，云望大梁趨。眷眷游子情，惻惻居人吁。  
斷蓬處田中，風舉而天衢。世塗多乖別，非徒泣楊朱。

其二

四牡駕朱輪，征夫出薊疆。冬旭耀寒圻，觀者盈路傍。  
借問此何爲，皇命爾肅將。山河盟帶礪，一扎綰十  
行。盛以金錯函，襲以錦盤囊。置之當轅軛，所重在  
王章。但軫靡及懷，焉知使者光。

其三

行行歲聿改，言及汴河濱。春風吹淥波，廣樂沸通津。



導入梁王苑鴈序鄒枚賓禮竟華筵張俎竿縱橫陳  
三爵未云已授簡何殷勤奮筆賦鴻篇逸氣薄蒼旻  
坐客咸辟易主君前自申馬卿已牢落千秋爾復振

其四

梁園非不樂王程詎敢稽朝辭淶竹館暮返薊亭栖  
經涉百餘城城哀黔黎一哀困徃租再哀愁鼓鼙  
翹首望君門君門隔雲霓太史采風人聞言良酸  
嘶停車遲不發奏草憑軾題天王本弘仁覽之重  
凄其

為嚴相公題三瑞圖三首

品物璨殊形至德合一軌軌一氣斯觸形殊類則似  
伊昔嚴園竹亭亭鈴罔趾蕭蕭霜雪斡猗猗東南美  
主人伏欲興靈篠闡玄理七節屈蠖伸岐枝雙翼起  
祥鍾兆果符跡奮悟同揆譬彼伶倫遭裁之吹宮徵  
旣舞阿閣鳳亦躍天池鯉熙化豈異求調律今在此  
誰謂嶰谷管復當楚山裏

右瑞竹

煌煌百卉內芝也擅其神檢圖誠弗爽召祥亦有因  
猗茲負鼎翁佐 帝康斯民斯民旣已康 皇情豫  
且親閣曰延恩名界之楚城闔其域未閣時有芝生

輪困俄而茲役興識者歎屢申青者表木德赤者象  
龍鱗綺錯非一色徵理見吉人謙謙君子志睹瑞懼  
益振上以謂乾造下以謂坤珍

右瑞芝

四運無停軌迅商萬妍謝盈盈池中萼灼灼長安舍  
孤莖翠自持雙蒂紅相射芳流詎因風光深不減夏  
觀者摩朝簪一顧一驚詫借問此何爲靈根結其下  
氣合株乃連精通色無亞何異同心人駢肩而並駕  
古人云此華服之能羽化美人玩不采但對持杯斝  
玩之有真契朝吟繼以夜

右嘉蓮

貢院贈袁懋中學士二首

自通金閨籍匪懈夙所將 帝命秉在茲焉得不徬  
徨爰有同心人深局共回翔子也踰伯樂我乃希夜  
光所願卞生歸持以充珪璋良驥苟在野胡以服君  
箱勉哉殫爾心毋令車下傷

其二

肅肅崇垣棘沉沉寒夜扉噉噉雲間鳥燦燦斗中輝  
佇立廣庭內星漢漸微微問余胡爲然具邪世所希  
誰與掘豐獄我思布重闈將令九苞羽下之覽其威

念在情無極寧知露沾衣

贈袁生督兵守鳳陽三首

初陽照東壁有客款我門問客何所之駕言趨帝  
園腰佩金錯刀羽旄豎戎軒意氣無江湖轅馬望路  
奔張君辨豐缺神光躍厚坤願子策高足慰我思所  
存

其二

汎舟越長江行行屆陵宮陵宮一何麗樓觀鬱雲  
虹崇巖翳松栢金闕羅巖熊將軍中夜起仰天天無  
風回寢顧牀頭寶刀挂雌雄但令四境謐疇願無元

功

其三

淮野山盤曲雉兔交回固躍馬徵徒出觀者盈路傍  
矢發不虛歸左右斃雙翔就碧敲石火灸鮮呼金觴  
還車意未已試巧疊穿楊從禽豈所欲聊以娛時康

燕子磯次韻二首

蔡生期久榮主父歎日暮始圖豈不偉終稅寂無趣  
伊余慚豹姿敢云附隱霧睽茲清江流前種蒼桑對  
四節逝不居奄忽改芳杜因之慕幽人冀與訂良晤  
天外狎鷗群雲中躡仙路所嗟乏羽翰萬里安能去

弱冠事遨遊廿年承雨露戀恩恩未酬檢齒齒非  
故驅逐將如何徒令鬢髮素

其二

旅愁苦未央日夜相糾錯雖云廁纓冕何異坐窘約  
散步出郊圻倏登川上閣波長情旣延景異跡仍泊  
目睇江雲卷意屬渚禽落祗令鄉思馳轉覺衣帶濶  
行止嗟誰尤悔吝亦自作王喬厭塵劫屈平嗜蘭薄  
往哉無淹駟去矣有飛鶴窈窕三山秀靈怪五丁鑿  
且共同懷子相從覓所樂

槐野先生存笥稿卷之二十九

槐野先生存笥稿卷之三十

左輔王維禎著 館甥渭上南師仲編

七言古詩一十首

贈孫伯子畫菊歌并序

以下北署稿

錦江行贈陸子使蜀

贈劉少叅赴楚守

顯陵

對雨篇

對雨後篇

相逢行贈艾少叅

石鼓殘文歌



封君鄭公以子朝慶太史貴衣錦南歸作畫錦

篇贈之

東海篇送劉太守入

覲 家居稿

北邙行

行後稿

七言古詩

贈孫伯子畫菊歌并序

楨所爲畫菊歌者辭旨局促才藻繁猥視古作者  
相距殆千里然以發抒花態抉剔筆精則自謂十  
九有中矣夫畫之道與詩通也神情苟會則意象  
隨具心手應援則態度弗乖古亦有言惟其有之

是以似之伯子之謂也若中無栽植臨景髮鬢得  
其莖則葉失體幹卽完色相不浮詩亦若是而已  
故諸執能之品未始無法泥法者隘弗學弗得自  
得者鮮哉楨自操觚以來注情篇什期詣淵邃然  
妙悟竟隔卽觀伯子所爲菊窮日拂玩脉脉灑灑  
遂有解如此云昔張旭善草書自以謂見公主與  
擔夫爭道而得其意已又觀公孫夫人舞劔而得  
神俊楨之童昧闇劣惡敢自託于古人然于徵類  
觸長之道因甲求乙之術則竊所學焉爲念通家  
骨肉之誼有投必合之情輒吐新識欲秘不得使

語諸人人則自延誕責此其因哉歌旣勒卷用備  
笥中一物且令觀者知西國鄙生有此崇嗜與看  
花玄都之儕異矣若其爲伯子傳聲于不朽則以  
侯賦落英之才蘊東籬之致者大衍厥辭楨非其  
輩也新暑薄人有言不得具然物理亦止此伯子  
其謂何

畫菊自有孫伯子眼中菊花無顏色千葩萬萼貌皆  
神鄭老王丞掩不得鄙人重菊左重孫初乞一揮挂  
吾軒霜天搖落群芳盡錦石崢嶸數對存坐觀立玩  
忻還訝紫艷金英爛相射恍惚如遊甘谷叢歲疑

傍東籬下東籬甘谷香難尋盡手千年直到今細藥  
疎枝秋嫋娜含煙帶露氣蕭森吁嗟伯子之菊胡爾  
殊少日致品自三吳分畦列植繞山墅朝吟把朶夕  
對壺一吟一醉情相悅便欲因之向點綴濡毫拂絹  
花神愁生色真機造化泄名筆今餘二十年長安門  
闕踏將穿孤芳一出連城賤尺幅持來萬戶傳孫伯  
子勁氣直操無與比畫中霜幹宛相似已知勲望收  
人寰况睹丹青冠 帝里東園繁華李共桃才看綽  
約倏飄搖南渚芙蓉雖稱絕娉婷可耐秋風高三花  
總不煩君手煩君更寫菊之友紫蘭翠竹園清泉天

寒歲暮恒相守

錦江行贈陸子使蜀

君不見濯錦江中錦爲水形勝冠絕西南州遠執逶迤作字轉清波湫澗帶花流蜀女濯錦錦爲燦水之奇異殊足歎安得臨流一玩之令我胸中生錦瀾錦瀾星橋萬里餘使君今乘駟馬車琴臺夕訪相如調草閣朝尋揚子廬揚馬千年俱已矣只今惟有錦江水君飲江水餐江芷期君文章亦如此人言君行解網羅君行猶自費吟哦峽對時聽啼血鳥渚風遙遞竹枝歌歲晚看君西南驚到時雪滿錦江路江頭得

句應念余江中鯉魚幸無數

贈劉少叅赴楚守 顯陵

先皇昔時乘飛龍龍飛兮墮楚山中其後瑤池邀  
聖母遺珮却在燕臺宮當時諸臣議頗紛或欲別隧  
比湘君所賴我 皇見不移同室同穴古有云嘉靖  
己亥二三月 大駕親行觀陵闕羨門馳道皆新啟  
荆榛爲掃山突兀歸來始發梓宮舟五月江平非人  
謀使者還報哀未已更 詔置吏守其丘茲丘蔽業  
俯南州下峰踞廂上盤繆金粟之山何足數黃帝橋  
陵未可儔中有桂對枝相結雙棲鸞鷲將九雛自從

置吏十年周關臨虎豹茂松楸崖頭石鏡光閃爍山  
鬼驚避殼啾啾劉君此去百不憂伏臘虛筵俎豆張  
但奉衣冠時出遊亭碑雙峙功德在閑剔苔蘚識蜎  
虬我聞洞庭以南卽蒼梧隔岸有廟帝女孤千年斑  
竹猶含怨一水盈盈不得俱只今 二聖共一山翠  
華雲輶相往還夜涼風起萬壑間虛空珊珊響珮環  
君也聞之動心顏嗚呼君也聞之動心顏

對雨篇

西山黯黯雲氣黑日落未落帶雨色夜深亂鴉九衢  
喧轟雷厭城雨翻盆攬衣驚出莽四顧前屋後屋溜

如注樓頭鐘鼓不聞傳但聞玉溝濺濺波濤怒此時  
上御集靈臺燭裏龍顏莞莞開平明筵張雨亦歇  
左右爭進萬年杯君不見大麥回枯小麥青社鼓賽  
神民樂生

對雨後篇

燕市雨餘花如簇買之百本植屋後晴日亭亭一株  
立餘枝散地垂不茂朝雲靈霽風淅瀝前雨旣足今  
雨又推窓看花意轉噴立者自立仆者仆栽培枉費  
主人心我堂不妍翻增陋雨兮雨兮澤何厚脈脈相  
對移清晝



相逢行贈艾少叅

艾子別予凡幾載長安柳色十更代邇來復走長安  
陌相逢杯酒俱感慨予今醜老昔朱顏子亦四十鬢  
且斑向來形容不自保何況萬事反覆間君不見漢  
家五侯雄甲舍車馬紛紛候門下草玄閣中揚子雲  
閉戶反遭時人罵又不見斯非結交誓死生秦雖貴  
斯非有名一朝寵利防傾奪背面戈矛不顧盟今人  
古人皆若此言之憤懣哀歌起五陵豪俠今非少百  
歲交游吾與子子到長安已再春宿昔意氣不沈淪  
要路朱門絕謁謝窮巷往往停車輪是時東北有胡

塵要子請予致其身吐膽傾心有大節蘭芬金斷豈  
常人歡遊未極復分散大梁遙指黃河岸君歸大梁  
憶長安予望黃河生嗟歎黃河淼淼與天連正月雪  
消注百川我乃持戟 帝座前安得同汎黃河船

石鼓殘文歌

我聞宣王石鼓史籀筆文辭簡質字鈎利歲久剥落  
揚摹昏讀者往往恨弗備頃登汪君堂見此更惆悵  
形畫失真事之微中興勲蹟隨彫喪於乎文武已歿  
成康往幽厲再傳姬祚衰田事不講武威弛宣也英  
英嗣其基岐山之陽廣且夷我馬可驅車可馳召從

百辟修舊典左駮右駢各有儀君王大輅吉日出旌  
旆凌亂天風吹駘駘騎射競獻巧喧鼗振山山爲披  
汧水汚水魚瀾瀾選徒擲網又一時事罷從臣奏大  
成爰請礮石勒其銘豈徒風烈紹先世要令千載垂  
鴻名人言禽荒古有誠彼美宣王寧無解獵狝內侵  
蠻夷侮我武不揚萬事壞請君究古蒐遺編叅訂闕  
文禪之全賢聖作事固可傳毋爲區區點畫論精妍  
封君鄭公以子朝慶太史貴衣錦南歸作畫錦  
篇贈之

海東旭日射郊紅鄭老南行趁曉風江草萋菲明錦

繡野雲繚繞護艤艤望望穿遙對錦衣驚起沙  
頭驚瞻 闕時開紫誥函含情轉盼赤霄路赤霄下  
直金馬門阿戎載筆擅詞源十年庭對傳詩禮九漢  
冥騰班鷺鷓鷺班中如鄭者共擬驂騑空萬馬家  
世元稱鄭子真文章况逼孟東野只今風譽動明堂  
帝曰推恩表義方五花細爛雲霞色雙鳳高銜日月  
章翁兮衣錦自茲始胡以貴翁視爾子四海殷華一  
日馳百年閎闕崇朝起故園風物那堪違衣錦翩翩  
晝日歸花光對色晴相映 玉勅霜色晚共輝吁嗟  
此去人共羨急柁飛檣馳如箭名高里閨鄭公鄉身

赴鷄黍香山宴香山高會樂偏饒衣錦如翁興更豪  
朝遊谷口田千頃夕飲潮頭月一瓢

東海篇送劉太守入覲

渭水湯湯流言歸東海東我送劉大夫臨流酌酒筒  
大夫東征氣磊磊聽我爲子歌東海東海天開萬水  
窟萬水東奔誰能改誰能改赴海門萬水灣環此水  
尊風雲晝吐蓬萊氣蛟蜃宵蟠日月根日月蓬萊光  
相映六鰲穩載波如鏡島樹嘗聞鸞鳳棲較人不道  
鯨鯢橫島中十二樓樓上集神仙絳節搖搖紛閃爍  
霞裳兩兩劇聯翩霞裳絳節數不計共向鈞陳朝玉

帝水底龍吟簫自吹雲中鶴喚曲新製一曲世所希  
玉帝朝來啟玉扉王喬從此登仙籍方朔今回近太  
微劉大夫覲 天子萬水朝宗宛相似君不見 皇  
家車書八表同 皇居正向海濱起君行會到東海  
濱蓬萊雙闕玉嶙峋 天子見之用爾作近臣不信  
試看王喬倫

北邙行

洛陽城中無繁華洛陽城北有古墓今人繁華古人  
爲古人不見見古樹寒食家家焚紙錢哭聲高處盡  
新阡古墓古樹空差峩斷碣殘文姓不傳邙山矗矗

不  
三  
幾千尺南望洛陽俯紫陌紫陌軒蓋人嘗避壠頭金  
印牛羊跡客下北邙遊燕關燕關忘却北邙山

槐野先生存笥稿卷之三十一

槐野先生存笥稿卷之三十一

左輔王維楨著 館甥渭上南師仲編

五言律詩八十六首

春登 郊壇偕諸同館三首 以下北署稿

別舍弟二首

送人奉使南歸

留別諸同館四首

慈恩寺納涼用郭質夫太史韻四首

立秋夜坐有懷三首

雨霽宴 郊壇徐奉常院二首



送駱太史謝病歸湖州四首

送黃僉憲赴山東二首

七夕宴集和陳太史

陳子詩期七夕宴集忽雨渝盟迺依韻嘲之

七夕雨二首

七月八日夜集陳子館

中秋夜飲景叔喬子和韻二首

送李子西憲使再赴汴臺

三忠祠

寄趙孟靜

陳戚畹宅同年會和孫志高韻四首

廣德寺送別陳子

千秋節二首

送趙明府赴長洲

送陳子侍父歸嵩山

詠孫氏第雪獅二首

左順門望文華有述

月夜孫志高見過

左順門偕諸寮上問  
安疏

冬夜孫志高宅對月

冬夜過孫錦衣太史昆仲留觴紀贈一首

雪後望西山

送兒二首

和袁子詠雪之作

初度二首

贈王懋中太史移居四首

壽甘母二首

大風

春日院中齋居對雪

同館寮宿院中

三月晦日諸館寮約集鄭園余坐阻不赴寄之

二首

俞侍御父母雙壽

七夕雨

秋夕齋宿

送廬子上 泰陵祠 昭聖太后二首

齋夜同彭孫歐三太史

中秋過汪氏二昆季玩月二首

贈潘使君赴汝寧二首

贈李侍御按雲中

送吳吏部謫大名二首

秋夕孫子見訪和韻

壽蕙諫議母許孺人蕙贈諫議得告歸侍二首  
雪中簡鄰舍汪子

五言律詩

春登 郊壇偕諸同館三首

爛熳簇金馬登臨俯紫霄  
飛花千對下曲磴五雲飄  
漢闕晴相映燕關望不遙  
和風特地起隱隱洞中簫

其二

珠履千盤轉夕雲  
四望開未須愁羽翰  
茲已傷三台

勝覽收堯甸長吟倚漢臺同遊俱俊妙把酒亦奇哉

其三

野曠瑤壇出天高霽色分丹梯觀日月玉珮引風雲  
鰲岫微茫現鸞簫彷彿聞每緣龍駕入長有赤霞文

別舍弟二首

猶是他鄉淚那堪爾更離腸回分手處被憶共眠時  
行斷鴻雙叫征遙馬獨嘶歸言好消息聊慰倚門思

其二

爾去伴春歸鶯花撩亂飛到知無市虎行擬訪庭闈  
骨肉他鄉淚桑麻故國扉金臺遙送日征騎入雲微

送人奉使南歸

幾載江鄉夢秋來此放舟  
晝歸看漢使宵泊和吳謳  
去指金陵對回瞻蒯闕樓  
君行有雙劍會遣紫光浮  
留別諸同館四首

湖海知名日雲霄結侶時  
相依憐王對贈別把松枝  
何地同看月因風好寄詩  
文園歸卧客萬里幸相思

其二

忍判金門袂却憐共直時  
聽鶯穿柳苑歌鳳倚花枝  
真美凌雲氣長吟伐木詩  
浮踪難自定延竚有深思

其三

蓬轉何須歎星團會有時爲言天上侶莫折道傍枝  
劍在輕分袂囊空感贈詩病來吟力減報爾愧清思

其四

今帝過炎武鄒枚盛一時雲龍游遠漢梧鳳在高枝  
苦抱還山癖愁吟戀闕詩莫將司馬薦病矣倦文  
思

慈恩寺納涼用郭質夫太史韻四首

地偏人不到曲砌徧苔磯自愛尋真入何嫌與世違  
薜房閒白羽藤樹挂緇衣毒熱愁無那蕭然一坐微

其二



五月亦何爽東林不傍村微風寒石榻濃木蔭溪蓀  
余是驅車客茲爲避世軒無生如可學捐珮未須論

其三

野外煩囂絕城中車馬紛偶來閒問社不是故離群  
淨院依風色游心憚日曛徘徊松栢裏香靄共氤氳

其四

日暮不知去棲禽啼滿林僧沾微月返星向暝樓臨  
偃蹇由來性遲迴自和吟明朝又城市愁見土盈襟

立秋夜坐有懷三首

爲客三看月關情獨此宵葉辭風裏木斗轉漢邊村

逝水嗟時序張燈坐寂寥  
隣人吹短笛不管旅魂消

其二

去年當此日葉下不爲妻  
鄉月當樓照園禽伴我啼  
撲螢行竹外披露卧軒西  
京洛關山絕秋風憶故棲

其三

塞草秋應茂胡奴欲犯關  
寐從今夜廢弓有幾人彎  
霄漢誰謀國華夷只限山  
書生空肉食自赧月中顏

雨霽宴 郊壇徐奉常院二首

愛此赤松家令予清興賒  
玉童調白鶴金竈閔丹砂  
衣潤臺邊露花迷洞口霞  
何當謝人世卽爾駐年華

其二

主人讌客情歌管步虛聲始信仙家別能令世慮輕  
青鸞棲竹院赤石映霞城猶自牽纓冕將無誤此生

送駱太史謝病歸湖州四首

忽謝金門直言尋碧海濱明時豈無意旅病苦傷神  
白髮愁中長青山夢裏真知非鷗鷺侶暫與薜蘿隣

其二

挂席下遙潯行行指越林菱歌醒旅夢鱸膾稱鄉心  
千里秋江水孤舟夜月吟和人渾不見霄漢有知音

其三

何處采芝苓松巖與石町一蕪司馬病重注子雲經  
舍外湖光白窓中越岫青客來時問字不得卧深扃  
其四

君家湖水上余住華山西不爲憐同調何緣惜解攜  
高林風葉下遠渚暮雲低望望行舟杳津樓費屢躋  
送黃僉憲赴山東二首

罷草辭蘭署驅車向海隅澄清今屬范平反舊名于  
蜃氣衝風落鯨濤絕岸遮東人應解說此後鮮冤夫  
其二

余意觀滄海君行謁孔林千年獲麟地半世望洋心

政憶哀矜訓宅聽絲竹音從知多古調老檜動長吟

七夕宴集和陳太史

靈匹今宵會言尋隔歲盟同懽吾在此競巧句雙成  
雲似仙鬟裊月疑玉珮明填橋鵲共去怪底樹無聲  
陳子詩期七夕宴集忽雨渝盟迺依韻嘲之

仙筵卽共賞風雨却寒盟不及雙星信河梁約竟成  
坐令佳節邁空對客燈明懽宴知誰第笙歌急夜聲  
七夕雨二首

暮雨綠何事仙娥赴舊期爲傷彌歲阻不以濕衣辭  
碧霧寒丹幄灑濤濺畫眉明宵如可再那畏險衝泥

其二

雨晦針樓夜燕姬恨不休  
驕雲急奔馬暝漢失牽牛  
博巧違今夕瞻星記後秋  
明當剪庭樹風葉易生愁

七月八日夜集陳子館

仙媛方怨別仙子復尋盟  
天上鵲橋斷人間燕席成  
杯含孤月白河間二星明  
佳會知難數酣歌盡漏聲

中秋夜飲景叔齋子和韻二首

織雲淨碧落圓月皓中央  
詎意今宵酒逢君引興長  
光搖杯影亂吟倚檻花芳  
高調真難和嘿然坐燭傍

其二

今夕非凡夕中宵宴未央風清知漏永月白仰天長  
樓笛飄淒調庭蘭溢暗芳留連銀渚曙徙倚美人傷

送李子西憲使再赴汴臺

梁苑與繁臺夫君屬再來豺移曾搗穴馬入舊題梅  
城是黃河抱衙當良獄開雖然持斧鉞猶可賦鄒枚

三忠祠

乍睹神如在却憐志不償身殲無社稷廟古有椒漿  
靈聚松杉院生憑鍊石腸千年識餘恨怒鐸起長廊

寄趙孟靜

劔閣青天外燕樓每自凭人皆極霄漢爾獨厭飛騰

卧倚深岩寺間邀同病僧禪心如有悟一寄五雲層

陳戚畹宅同年會和孫志高韻四首

俱起脫荷裳聯趨傍日光十年霄漢客七貴鬱金堂  
興逐燕歌發衣攜御案香猶思曲江舊春水遶青蒼

其二

今筵已此地來聚復何時共戀看花伴齊吟伐木詩  
淹杯忘景夕闕唱見雲移無限乾坤事誰當遂所期

其三

仙曹錦繡裳仙醴玻璃光歌起雲停戶簫鳴鳳在堂  
梅風遞花樹蘭霧裊爐香不盡追攀意何言暮色蒼



其四

一別十年去百年能幾時  
殷勤醉後語慷慨座中詩  
城晚霜笳動歌闌錦瑟移  
相看歎踪跡萍海渺難期

廣德寺送別陳子

俱是游京國獨憐尋故山  
鄉心因子劇別句對僧刪  
枯沼風荷咽空林夕鳥間  
前程愁欲暮乞與一燈還

千秋節二首

七歲卽明聖仙才信不虛  
生來龍鳳表誦得典謨書  
玉闕千官舞金枝九葉舒  
願言時問寢常到萬年廬

其二

拜舞集天閣仙盤上曉暎未能通漢苑先得奉堯樽  
露湛彤墀草笙聞白鶴軒從今億萬載長此戴明恩

送趙明府赴長洲

春擬到蘓臺江流面面回東風一夜發曉樹萬花開  
庖岫傳名壤牛刀試異才公餘若問古吳苑盡蒿萊

送陳子侍父歸嵩山

阿翁懷舊隱子亦戀鄉關雙駕青門外歸塗白雪間  
身溫寒夜席衣學古人斑明到嵩山曲芝觴好駐顏

詠孫氏第雪獅二首

豈自條邦至疑從崑岫生風毛翻玉屑日彩盪羣精

踞地如思奮看人似欲鳴情知非信有臨視意頗驚

其二

入庭真足詫何物爾崢嶸瑰狀爍雙眼竒毛縮六英  
衝風寒益壯不月夜猶明雖在階除裏還看猛氣橫

左順門望文華有述

門爲通天峻宮因抱日華露明曾徬柳春動舊穿花  
鑪氣連王氣墀霞映閣霞含情獨佇立高處見栖鴉

月夜孫志高見過

君有王猷興余慚戴子家過逢乘夜月門館靜雲霞  
貧擬來人少詩憐古意賒同轍今復幾莫便轉歸車

左順門偕諸寮上問 安疏

臣心似丹靄長傍 帝宮飛壽已占千歲身應爲九  
圍函中犬馬戀 闕下羽林威晚候金門側瞻依極  
暮歸

冬夜孫志高宅對月

今夜華堂月盈盈坐玉壺影流疎竹動光滿一燈無  
城笛關山調君詩合浦珠不歸非漫興此地可忘吾  
冬夜過孫錦衣太史昆仲留觴紀贈一首

嗜靜雖吾癖談竒卽爾過杯香雙桂映雪霽二鴻和  
太史元稱馬將軍舊姓何徘徊不欲去天地此吟窩

雪後望西山

常愛城頭色今看雪後容  
蒼碧排玉戟瑤樹變青松  
皓失雲林鶴寒蟠洞壑龍  
何因一駐馬水澗聽清淙

送兄二首

預愁分後苦羈抱向誰論  
雪裏征人道天涯獨客魂  
寂寥棠棣館迢遞鵲鳩原  
意到家山日池塘草漸繁

其二

念歲憐兄暮一官猶待年  
探囊今已盡剖袂淚同潺  
白髮臨河苦青霄望日懸  
他時問消息鴻鴈自須傳

和袁子詠雪之作

天風吹白雪來伴玉人清身似栖梁苑歌應繼郢城  
亂飄梅閣重輕繞竹窓最憶袁安舍期來倒數觥

初度二首

母也彌六旬余今半世人猶多三徙媿未老五雲身  
觴酒來燕市冰盤具海鱗朝來稱慶地冬日可相親

其二

少小從文墨于今只故吾徒然游鳳沼未是探驪珠  
鏡裏容顏換域中風漸殊碧山有舊業將擬著潛夫  
贈王懋中太史移居四首

苑木斜連戶宮梅近拂墻氣侵琴劔濕風染竹蘿香

虛閣玄經就閒門碧草長雖然住霄漢何異在林塘

其二

寂寞唯孤室豪華自五陵門喧裘馬過樓望海雲凭  
愛竹呼君對遺書向友徵不須愁夜讀自有金蓮燈

其三

昔注城臨屋今棲市接門多君不擇地得道自忘喧  
車馬朝天路蓬蒿吏隱軒可言渾掃却時有問竒煩

其四

歲宴春將起遶庭青草生官閒長繫馬柳細蚤啼鶯  
鄉物吳王劍臣心漢士纓更憐芳調合竊有結隣情

壽甘母二首

令子皆成孟名媛不羨曹里中傳聞範天上有宮袍  
銜鳳恩長下丸熊意獨勞只今望雲客目極錦江臯  
其二

定想稱觴地秋花帶露舒笙邀西海鶴饌釣錦江魚  
健在年從積庭深桂不疎晚來歌舞劇彩婺挂門閭  
大風

長安正月暮強半烈風吹苑草寒仍細城雲晚更馳  
翻空朝執壯入樹鵲巢危不惜摧揚柳傷心桃李枝  
春日院中齊居對雪



漸見青歸柳，忽蘂白。酒扉暖風微，着地急執曲穿幃。  
寒勒庭花發，膏滋野草非。端居疑節序，肅志迓天威。

同館寮宿院中

話久輟青燈，宵寒擁翠綾。枝鳴宿鳥動，窓影曙光昇。  
人語鷄聲盡，風庭雪氣增。夫君莫問夢，多懷寐未能。

三月晦日諸館寮約集鄭園，余坐阻不赴，寄之。

二首

今春今日盡游侶，出京華谷口鳴珂入桃源。背郭斜  
林鶯調妙曲，席菜墮殘霞。佳賞休言暮，姚黃冠百花。

其二

一春長抱戚笑口可能開漫使花殘樹空聞酒上臺  
喧庭憎鳥雀荒院任莓苔獨倚詩排悶詩成意轉摧

俞侍御父母雙壽

龐德無聞子梁鴻祗令妻何如越江叟茲事總能齊  
鶴島形雙老鳧州影並栖獨令栢臺史日夕望雲迷

七夕雨

爲是靈媛會今宵雨故來濛濛連魏闕黯黯似陽臺  
城葉蕪蔽下堦蟲帶濕哀客心空戀節河漢仰悠哉

秋夕齋宿

坐徹清秋夜遙思太乙壇三天神共下五嶽帝同安

祝史將金錄香燈擁王冠微臣不可到亦有寸心丹  
送廬子上 泰陵祠 昭聖太后二首

虞帝英爲嬪周王妘作述當年稱二聖此日閉重丘  
雲慘蒼梧夕風悲玉殿秋侍臣瞻切際鳳輦必來遊  
其二

仙寢金鳧海 皇心白露園秋行嚴 帝遣夕奠降  
靈媛鍾鼓空山應霜天宰木翻知君懷舊德悽斷關  
睢言

齋夜同彭孫歐三太史

微微寒燭盡晤語向深宵千響秋驚宋同心暗祝堯

窓虛覺露下桂落想天高漸見雲低戶應催萬壽詮  
中秋過汪氏二昆季玩月二首

孤月明無際繁星淡不輝只疑金鏡轉却道玉盤飛  
氣逼浮雲斂光含白露微無因生羽翰萬里但瞻依

其二

謝庭欣得月長夜坐忘還歌酒耽燕俗池塘印鄭環  
憐香依桂樹聞笛憶關山重以南鴻度君心江漢間  
贈潘使君赴汝寧二首

使君分部所山水似宣城露冕千人望板橋五馬行  
吟知齋對岫政想卧爲轂簿領焉能累由來謝眺名

其二

汲黯猶爲郡黃公終賜金但愁徵拜日無奈借留心  
舊直旌摧檻新鞭繞贈音嗟予傾蓋晚相望意何深  
贈李侍御按雲中二首

青驄白玉環之子向邊關影度桑乾水日寬句注山  
防胡身佩劔弔寶石成斑霜氣因君早寒威八月間  
其二

年年此戎馬望望半空村陰火寃夫氣秋笳漢使魂  
背人鴻入塞行部鷺隨軒白簡無嫌數安危在討論  
送吳吏部謫大名二首

簪組 先朝舊吾鄉不乏賢君今下霄漢予意重悽  
然曾傅投湘日屈平辭楚年離筵顧儔侶落落曉星  
天

其二

謫處王畿切無歌行路言爲官殊盡虎得臯類亡猿  
澶水涉旬到滑臺望斗繁 君王闕日月終爲照翻  
盆

秋夕孫子見訪和韻

美人今夕至明月故徘徊案帙秋螢點隣機寒女裁  
驚心時序晚淹坐鼓鐘催俱是他鄉客堪聞北鴈來

不台有  
卷三十一  
壽蘇諫議母許孺人兼贈諫議得告歸侍二首  
嶺表無黃葉年多不記秋但知霜入髮曾見海爲疇  
跨鶴身同健丸熊意竟酬獨憐游子遠霄漢望歸舟

其二

歸舟遵海入應慰倚門心綵袖重溟映芳蘭五嶺尋  
承恩將錦誥獻壽耻黃金唯有白華曲傳來清廟音  
雪中簡隣舍汪子

君爲南楚客我乃西秦人舊國元連壤今居更卜隣  
坐看簾外雪調憶郢中新興至相尋易無愁棹遠津  
槐野先生存笥稿卷之三十一